

Réponse commune de Monsieur le Ministre de la Sécurité intérieure Etienne SCHNEIDER et de Monsieur le Ministre de la Justice Félix BRAZ à la question parlementaire n° 1682 du 12 janvier 2016 de l'honorable député Fernand KARTHEISER

Den honorablen Deputéierte stellt a senger parlamentarescher Ufro e puer Behauptungen op, déi een net sou einfach kann am Raum stoe loossen.

Et ass net richtig fir pauschal ze behaupten, dass d'Fäll vu Gewalt géint Persounen zouhuelen, notament op der Strooss.

An deem Kontext ass et wichteg fir sech op déi offiziell Statistiken ze beruffen. An obwuel d'Statistike vun der Police fir d'Joer 2015 nach net fäerdeg sinn, sou gesäit et am Moment dono aus, wéi wann déi gewalttätig Strofdote géint Persounen fir 2015 éischer méi déif si wéi déi vun 2014, an och vergläichbar si mat deenen aus de Joeren 2012 an 2013. Mee souguer déi Zuele sinn hei mat Virsicht ze huelen, well och déi Statistike maachen an der Rubrik "*violences contre les personnes*" net den Ennerscheid, ob déi Strofdoten op der Strooss oder op enger anerer Plaz begaangen gi sinn.

Dat selwecht gelt fir déi Behauptung vu "rechtsfräien Zonen". D'Police léisst dat néierens zou an intervenéiert.

D'Behauptung, dass de sougenannte Pefferspray e "probat" Mittel wier fir sech géint kriminell Persounen ze wieren ass am héchste Mooss kontestabel, well se net déi wichteg Tatsaach berücksichtegt, dass eng Liberaliséierung vum Wafferecht et net nëmmen de Bierger méi llicht mécht fir un eng Waff ze kommen, mee virun allem och den Täter. D'Situatioun an den USA illustréiert dat ganz gutt.

Déi puer Erfahrungen, déi hei am Land mat Waffen am Beräich "auto-défense" gemaach gi sinn, hünne och gewisen, dass de Gebrauch vun enger Waff vum Affer am Enderfekt éischer zu sengem Nodeel war, well d'Täter et an der Regel fäerdeg bruecht hu fir den Iwwerraschungsmoment ze nötzten an dem Affer d'Waff ofzehuelen, et domat ze menacéieren, an duerno och nach d'Waff matzehuelen.

Et dierf een an deem Kontext och net vergiessen, dass eng Liberaliséierung vum Waffebesetz onweigerlech ëmmer de Prinzip vum staatleche Gewaltmonopol a Fro stellt. An dat ass eng Entwécklung, déi hei zu Lëtzebuerg sécherlech net begreissenswäert wier, an doriwuer besteet zanter laangem e breede politesche Konsens.

Och de franséische Modell op deen sech den honorabelen Deputéierte beriff – Pefferspray am fräie Verkaf oder geneemegungspflichteg, je no senger Wirkungsstäerkt – ass keng Léisung an huët och keng statistesch Verbesserung mat sech bruecht.

Op déi konkret Fro vum honorabelen Deputéierte kann also nëmmen an deem Sënn geäntwert ginn, dass et am Moment net ugeduecht ass, fir de Verkaf an de Besëtz vu Pefferspray ze liberaliséieren.